

四庫全書

集部

欽定四庫全書

聖祖仁皇帝御製文第二集卷九目錄

勅諭

諭內閣

諭大學士伊桑阿阿蘭泰學士朱都納邁圖西
安布顏圖郭世隆王國昌

諭大學士伊桑阿阿蘭泰學士朱都納邁圖西
安博濟布顏圖郭世隆王國昌

諭

三朝國史館總裁大學士伊桑阿等

諭內閣

諭內閣

諭戶部

諭和碩裕親王福全等

諭和碩恭親王常寧等

諭戶部

諭大學士伊桑阿阿蘭泰學士朱都納西安博

濟王國昌

諭大學士阿蘭泰

諭戶部

諭內閣

諭大學士伊桑阿阿蘭泰學士朱都納西安博

濟王國昌

諭大學士伊桑阿阿蘭泰學士朱都納西安博

濟王國昌

諭兵部

諭都統瓦岱等

諭都統郎談等

諭大學士伊桑阿阿蘭泰兵部尚書馬奇學士

邁圖西安博濟南塔海

諭大學士伊桑阿阿蘭泰

諭大學士伊桑阿阿蘭泰學士邁圖西安博濟

南塔海傳繼祖

欽定四庫全書

卷九目錄

欽定四庫全書

聖祖仁皇帝御製文第二集卷九

勅諭

諭內閣

蒙古稟性怠惰不能深計生業往歲小旱即致饑窘初
意賑贍乏食之人所需有限及觀散給米穀之數至多
凡人生業各自勤勉必籌畫終歲之計撙節用度方可
不致窮困若每求賑贍終於生聚無日今正當暄和之

時遣通曉蒙古事務重臣會同外藩之諸王貝勒貝子
台吉等作何逐家教諭令其各勤生業旗內貧人作何
養贍俾安樂利凡此數者當令其規畫久遠詳細商酌
可下議政王貝勒大臣會同確議以聞康熙二十九年
四月十六日

諭大學士伊桑阿阿蘭泰學士朱都納邁圖西安
布顏圖郭世隆王國昌

汝等行文諭倉場侍郎凱音布原任總河靳輔曰山東

河道自分水龍王廟以南流入運河之水不一而足舟
行無阻分水龍王廟以北匯入運河者惟河南衛水而
已並無別渠相濟南旺所蓄之水又不能多常致淤淺
阻滯今將駱馬湖之水不令其自禹王臺流入沫河俾
駱馬湖之水蓄貯毋洩於運道有無裨益至駱馬湖與
南旺等湖相距地勢高低抑復如何山東東阿縣之鹽
河及別河有可通入運河者否河南衛河之外有別河
可資以疏入運河者否著凱音布靳輔訪其地諳練之

人委曲諮詢若有可措施之處親加詳閱繪圖來奏康熙二十九年四月十七日

諭大學士伊桑阿阿蘭泰學士朱都納邁圖西安博濟布顏圖郭世隆王國昌

太常寺鴻臚寺等衙門鳴贊官原擇其聲音弘亮者選用論俸陞為主事若等歷年未久乃由捷徑反越年久筆帖式先陞其聲音不善者取為鳴贊閱數年並未贊禮一次者有之可下旨太常寺鴻臚寺等衙門察現任

鳴贊等官將聲音劣者題叅革其鳴贊以筆帖式補用
如將劣者不行斥革朕察出并治罪焉康熙二十九年
四月二十四日

諭

三朝國史館總裁大學士伊桑阿等

朕惟帝王肇基垂統綏御萬方駿業弘謨必勤諸簡冊
傳示無窮所以炳耀豐功宣揚至治甚盛典也我

太祖高皇帝誕膺寶錄鼎命維新締造丕圖規模宏遠

太宗文皇帝道隆作述運啓休明式廓禎符燕貽景祚
世祖章皇帝統一寰區化成治定中和懋建聲教遐敷
惟

列聖之相承冠百王而首出鴻猷峻德巍煥難名緯武
經文昭垂無數舉凡戡亂安邦之略立綱陳紀之宜用
人行政之方牖民成俗之本布於方策歷久彌新創制
顯庸燦然明備卽當時勲舊諸臣翊贊王室宣力四方
亦莫不託附風雲懋彰勞績惟從龍而應運信昭代之

多才朕夙夜紹庭思聞

先烈爰命儒臣恭修

三朝國史茲特命爾為總裁官爾其督率在館諸臣薈萃琅函博蒐掌故折衷至當裁訂成書毋尚浮夸而乖情實毋徇偏見而失公平毋過質略而意不周該毋務鋪張而詞多繁縟務期事歸確核文極雅馴勤以董成敏而竣事庶幾垂型萬世傳信千秋以觀耿光以揚大烈稱朕意焉爾其勉之母忽欽哉康熙二十九年五月

初一日

諭內閣

河道所關至為重大一二年來雨水稀少管河官必視河道為常事矣今年景象似多雨水可馳諭總河嚴飭該管官晝夜防視務保河隄無虞特諭康熙二十九年五月二十二日

諭內閣

所派漢軍一千五百鳥鎗兵每名賞銀十兩如兵不遣

發亦免其追取即與之可耳出征人員之外凡漢軍內外現任及候缺堂官以下筆帖式等官以上各令捐一馬以給軍士康熙二十九年六月二十一日

諭戶部

朕撫育蒸黎勤求民瘼務期休養漸致阜安閭閻間有疾苦朕衷時切軫念近見廣東高州瓊州等府所屬州縣丁地各項錢糧歷年每致逋欠此內係官役侵漁及豪強頑梗抗納者自應嚴究追取如果因丁缺地荒不

能輸納儻仍行征比照例考成小民既困追呼有司復
惟叅罰徒滋擾累終無裨益著該督撫將實係戶口稀
少田畝荒蕪一切徭賦無從辦納州縣歷年所欠錢糧
數目詳加察明具奏尔部即遵諭行特諭康熙二十九
年六月二十八日

諭和碩裕親王福全等

喀爾喀厄魯特原屬同修職貢之國因伊等交惡搆兵
朕不忍民生塗炭曾遣使與達賴喇嘛使人偕往厄魯

特諭令仍尋舊好乃厄魯特噶爾丹陽順陰違反侵擾
我屬部掠奪烏朱穆秦四佐領茲用遣發大軍聲罪致
討特命尔和碩裕親王福全為撫遠大將軍皇長子允
禔為副與內大臣國舅佟國維內大臣索額明珠阿
密達公蘇努都統國舅佟國綱公彭春都統諾邁護軍
統領楊代前鋒統領邁圖等籌畫善策協議舉行勿謂
自知而不納衆論勿當事會而致失機宜勿恃兵強而
輕視逆寇嚴偵遠探罔或疏虞其統領蒙古兵丁前來

之王貝勒扎薩克台吉等亦與共相商確酌量而行所
調盛京烏喇官兵到時尔一併統率調遣有能擒斬噶
爾丹來歸者分別陞賞尔須約束將士申嚴紀律凡經
過地方毋得騷擾百姓歸順良民加意撫恤務體朕定
亂懷遠至意其行間將領功績及重罪俱察實紀明彙
奏各官有犯小過者當即處分至於驍騎校護軍校以
下無論大小罪過俱商酌徑行處治務將厄魯特殲剿
廓清安靖邊圉斯稱委任尔等宜殫竭心力蚤奏膚功

欽哉故諭康熙二十九年七月初五日

諭和碩恭親王常寧等

喀爾喀厄魯特原屬同修職貢之國因伊等交惡構兵朕不忍民生塗炭曾遣使與達賴喇嘛使人偕往厄魯特諭令仍尋舊好乃厄魯特噶爾丹陽順陰違反侵擾我屬部掠奪烏朱穆秦四佐領茲用遣發大軍聲罪致討特命尔和碩恭親王常寧為安北大將軍和碩簡親王雅布多羅信郡王鄂札為副與都統喇克達阿錫坦

前鋒統領班達爾沙護軍統領繆齊納等統領官兵前往征剿行間諸事爾與和碩簡親王雅布多羅信郡王鄂札都統喇克達阿錫坦前鋒統領班達爾沙護軍統領繆齊納等籌畫善策協議舉行勿謂自知而不納衆論勿當事會而致失機宜勿恃兵強而輕視逆寇嚴偵遠探罔或疎虞其統領蒙古兵丁前來之王貝勒扎薩克台吉等亦與共相商確酌量而行所調盛京烏喇官兵到時爾一併統率調遣有能擒斬噶爾丹來歸者分

別陞賞爾須約束將士申嚴紀律凡經過地方毋得騷擾百姓歸順良民加意撫恤務體朕定亂懷遠至意其行間將領功績及重罪俱察實紀明彙奏各官有犯小過者當即處分至於驍騎校護軍校以下無論大小罪過俱商酌徑行處治務將厄魯特殲剿廓清安靖邊圉斯稱委任爾等宜殫竭心力蚤奏膚功欽哉故諭康熙二十九年七月初五日

諭戶部

朕撫育黎元勤思治理足民之道宜裕蓋藏從來水旱
靡常必豐年恒有積貯庶歉歲不憂饑饉如康熙二十
七年頗稱豐稔誠使民間經營搏節早為儲侍何至二
十八年偶遇旱侵室皆懸磬總因先時無備遂致餬口
維艱比蠲除正賦特發帑金分行賑濟所在官司悉仰
體朕懷竭力從事被災之衆始獲安全倘非拯救多方
則甓黎必流移失所今霖雨時降黍苗被野刈穫在即
可望有秋惟恐愚民不知愛惜物力狼藉耗費祇為目

前之計罔圖來歲之需縱今年獲屢豐亦難漸臻殷阜
應行直省各督撫嚴飭地方官吏家喻戶曉務俾及時
積貯度終歲所食常有餘儲用副朕軫念民依綢繆區
畫至意尔部即遵諭行特諭康熙二十九年七月初十
日

諭大學士伊桑阿阿蘭泰學士朱都納西安博濟

王國昌

今軍士年少者衆不諳戰陣聞日者用師士卒步伐止

齊皆未嫺習春秋二季應加訓練可下旨議政大臣具議以聞康熙二十九年七月十一日

諭大學士阿蘭泰

驛務所繫綦要巡撫于成龍可親至京師前往綜理驛站其標下所調士卒著委賢能官隨後統率往至遵化天津總兵官標下士卒不必調赴保定即委賢能官自天津啓行徑往遵化著兵部差善馳馬官一員往諭之康熙二十九年七月三十日

諭戶部

盛京兵丁全恃南畝耕穫及月給糧餉以爲資生之計
昨歲盛京禾稼不登貧困兵丁艱於粒食曾以所有屯
糧頒發賑救頃值軍興遣一等待衛齊蘭布往調盛京
兵丁隨發諭旨令無馬匹者給以官厰馬匹無行糧者
給以莊屯糧米而官兵因踴躍遄征倉卒之際置辦一
切軍裝遂支領明年二月分應給俸餉又預支五箇月
錢糧刻期進發比厄魯特噶爾丹敗遁盛京官兵雖未

經接戰而奮勇敢愾深可嘉悅今若將預支俸餉復行
抵扣則窮乏兵丁必致生計艱窘朕心殊切憫惻所預
給明年二月分應支俸餉及增給五箇月錢糧著免抵
扣仍照常支給俸餉以示朕愛養將士軫恤疾苦至意
爾部即遵諭行特諭康熙二十九年九月初四日

諭內閣

邊外捕賊被殺者卹與身價被創者以受傷銀兩給之
守關口之章京守備把總等官及軍士皆勉効勞勩亦

賞賚之可諭兵部康熙二十九年九月十四日

諭大學士伊桑阿阿蘭泰學士朱都納西安博濟

王國昌

盛京軍士皆能挽強但其地雖有筋與弦而無牛角所以軍士難得良弓盛京既有筋弦及工匠而戶部庫內現貯牛角今年即發角二千對運至將軍公署將軍等可監視造弓散給軍士自明年為始每年以角一千對發往盛京將軍可也康熙二十九年十月初四日

諭大學士伊桑阿阿蘭泰學士朱都納西安博濟

王國昌

吳爾泰自主事優陞郎中差往福建審理時朕曾以所
審情事明白訓諭吳爾泰至彼妄滋事端將衆知府盡
令解任州縣各官槩取供狀聲言夾訊巡撫恣意嚇詐
以致福建百姓驚惶罷市數日違朕諭旨而行此等之
人不加懲治則後之獨奉差遣審理事務者罔知儆戒
矣吳爾泰著革去郎中發往黑龍江効力尔等可傳旨

諭彼罹茲罪戾今誰能援救而護蔽之也康熙二十九年十月初五日

諭兵部

京師為輦轂重地人民商賈四方輻輳京城內外統轄必有專責務俾稽察奸宄消弭盜賊然後商民得以安堵今城內地方既屬步軍統領管理城外巡捕三營又屬兵部督捕等衙門管轄內外責任各殊不相統攝遇有盜案反難察緝嗣後巡捕三營亦令步軍統領管理

京城內外一體巡察責任既專則於芟除盜賊安輯商民庶有裨益其三營事務作何歸併管理著九卿詹事科道會同確議具奏尔部即遵諭行康熙三十年二月初一日

諭都統瓦岱等

茲以厄魯特噶爾丹去歲雖經大敗立誓陳請但伊性生奸狡或乘我不備突來搶掠近邊歸順喀爾喀等亦未可定故遣發大兵特命尔都統瓦岱為定北將軍前

往張家口駐劄防備凡事爾同都統喀代王永譽護軍
統領洪海副都統方格科爾代喻維邦商酌而行駐劄
張家口將兵丁馬匹飼養肥壯務須整擷器械嚴肅官
兵不得騷擾民間其一應錢糧聽有司各官應付地方
事情不得干預至於官兵俱有部頒紀律如有違犯爾
等會同商酌照依定例處分不得姑息以致紀律懈弛
若有出口應行機宜另頒諭旨爾等其慎之故諭康熙

三十年二月初一日

諭都統郎談等

茲以厄魯特噶爾丹去歲雖經大敗立誓陳請但伊性
生奸狡或乘我不備突來搶掠近邊歸順喀爾喀等亦
未可定故遣發大兵特命爾都統郎談為安北將軍前
往大同府駐劄防備凡事爾同都統公宗室華善都統
李正宗護軍統領宗室輝蘭副都統委署前鋒統領碩
鼐副都統馬齊田象坤郎化麟商酌而行駐劄大同府
將兵丁馬匹飼養肥壯務須整擷器械嚴束官兵不得

騷擾民間其一應錢糧聽有司各官應付地方事情不得干預至於官兵俱有部頒紀律如有違犯尔等會同商酌照依定例處分不得姑息以致紀律懈弛若有出口應行機宜另頒諭旨尔等其慎之故諭康熙三十年二月初一日

諭大學士伊桑阿阿蘭泰兵部尚書馬奇學士邁圖西安博濟南塔海

八旗滿洲蒙古漢軍以至內府佐領其護軍校驍騎校

小撥什庫護軍及另戶披甲孤子寡婦之家僕披甲者
所借債負本銀所賣餉銀糧米俱令清察實數察核時
若本無債負而假為稱貸取與本未賣餉銀糧米而假
為買賣互相造謀虛誑作証將詐偽及妄保之人即行
正法斷不姑貸也康熙三十年二月初七日

諭大學士伊桑阿阿蘭泰

八旗中貧乏之人令清察其債負此事情前降諭旨甚
明若稽遲時日必滋弊端叢生令迅速察奏內府佐領

令各該都統詳悉嚴察康熙三十年二月十二日


諭大學士伊桑阿阿蘭泰學士邁圖西安博濟南

塔海傳繼祖

八旗兵丁債負償還之後若又遇有不得已之事必需
稱貸者向部借貸則事體煩擾應於各旗派出部院堂
官與該都統及副都統公同酌視其所遭之事以官銀
借貸逐月於錢糧扣除如此則兵丁斷然不致困乏每
月餉銀糧米得以自贍而不至有稱貸之苦將永永裨

益矣應派堂官戶部列名具奏康熙三十年二月十六

日



聖祖仁皇帝御製文第二集卷九

欽定四庫全書

集部

聖祖仁皇帝御製文第二集卷十二

臣 永瑤 恭 校

侍讀臣孫球覆勘

覆校官中書臣 施光輅

校對官助教臣 胡予襄

謄錄監生 臣 馬步蟾

欽定四庫全書

聖祖仁皇帝御製文二集卷十目錄

勅諭

諭戶部

諭大學士伊桑阿阿蘭泰學士邁圖西安南塔
海傳繼祖

諭大學士伊桑阿阿蘭泰王熙梁清標張玉書
學士邁圖博濟傳繼祖王國昌年遐齡彭孫

適王尹方

諭大學士伊桑阿等

諭大學士伊桑阿阿蘭泰學士邁圖西安博濟

傅繼祖王國昌年遐齡

諭內閣

諭戶部

諭戶部

諭內閣

諭內閣

諭內閣

諭內閣

諭內閣

諭吏部

諭內閣

諭戶部

諭禮部

諭大學士伊桑阿阿蘭泰學士滿丕圖納哈思
格則德珠王國昌理藩院尚書額爾赫圖署
侍郎事學士達瑚

諭戶部

諭戶部

諭內閣

諭兵部

欽定四庫全書

聖祖仁皇帝御製文二集卷十

勅諭

諭戶部

八旗甲兵國家根本當使生計充裕匱乏無虞向因剿除三逆久歷行間製辦軍器購送馬匹兼之戶口日增費用益廣以致物力漸絀稱貸滋多朕每念及深為軫惻若不大沛恩施清完夙逋將愈至困迫難以資生今

八旗滿洲蒙古護軍校驍騎校及另戶護軍撥什庫馬
甲併子幼或無嗣寡婦老病傷殘告退人等家下馬甲
所有積債爾部動支庫銀給還漢軍每佐領各給銀五
千兩令其償還債負外餘者各該都統收貯以備公用
其口外駐牧八旗察哈爾兵丁出征隨圍凡有差使一
同効力向竝未給錢糧亦屬可憫嗣後察哈爾護軍校
驍騎校護軍撥什庫著月給錢糧各二兩甲兵及執事
人竝太僕寺牧廠人役著月給錢糧各一兩俟其贍足

時停支爾部即遵諭行特諭康熙三十年二月十七日

諭大學士伊桑阿阿蘭泰學士邁圖西安南塔海

傳繼祖

盛京官屯五十所沿邊丁壯設為屯二十五所遷移於
烏喇念此莊屯及沿邊丁壯居住年久已成聚落今遽
令遷移如此衆多人戶生業蕩然必致苦累仍留於盛
京與遷移於烏喇皆公家之屯其為納賦則一也朕意
此莊屯應停其遷徙於烏喇兵丁每歲派三百名耕種

或一歲以烏喇之兵一歲以捕牲之人輪年耕種亦可
以積穀矣此事所關綦重著學士麻爾圖馳驛往盛京
烏喇令將軍副都統各部堂官悉喻朕意伊等之意若
何詳議回奏康熙三十年二月十八日

諭大學士伊桑阿阿蘭泰王熙梁清標張玉書學
士邁圖博極傳繼祖王國昌年遐齡彭孫適王
尹方

河道所關重大凡修築濬治必速竣厥工斯有裨益冬

則以沍寒凝凍春則以桃花水發夏秋則又以水澤漲
溢難於興工屢請展限是週歲無可經營之日矣毛成
舖地方最要理宜尅期完工工部不行詳察草率朦混
議展限三月殊屬未審可以此嚴諭尚書席珠河務工
程若如此怠緩萬一泛漲衝決致壞河道汝能任此咎
乎爾衙門竝記之康熙三十年五月二十六日

諭大學士伊桑阿等

喀爾喀原係進貢之國伊等不和知其必敗曾特遣大

臣諭令和好後乃渝好與厄魯特構戰窘迫來歸屢失
生業窮困已極朕以好生之心撫綏養育曲盡周詳因
此懇切抒誠願同四十九旗一例蓋理所必然且比年
來旱澇頻仍民生猶未蘇息風俗猶未醇厚奢靡猶未
盡止朋黨猶未悉除彼此援引傾害猶未屏絕理應日
益圖新時加黽勉君臣殫心竭力尚恐不逮居然以為
至治遽受尊號斷為不可所奏已知之康熙三十年五

月二十七日

諭大學士伊桑阿阿蘭泰學士邁圖西安博極傳

繼祖王國昌年遐齡

黑龍江松花江接壤之地彼處附近所居根奇勒諸姓
中原有可披甲之人應酌量令其披甲駐防遣滿洲兵
八十人往彼教訓之齊七喀爾地方以索倫達呼里之
衆酌量令其披甲駐防遣滿洲兵二百人往彼教訓之
伊等居址附近亦心樂披甲如此則既無遠徙之苦亦
不致需用糗糧矣可以此詢問都統巴海令理藩院集

議政諸臣會議以聞康熙三十年六月十六日

諭內閣

戶部差年壯司官一員令馳驛至直隸巡撫處詳悉詢問畿輔所屬地方雨澤曾否霑足蝗蝻較前何如還奏康熙三十年六月二十二日

諭戶部

朕頃巡行邊外入喜峰口見有民間田畝為蝗蝻所傷又聞榛子鎮及豐潤等處地方被蝗災者亦所在間有

秋成失望則糧食維艱朕心深切軫念僅及今不為區
畫儲蓄恐至來歲不免饑饉之虞著行該撫親歷直隸
被災各州縣通加察勘悉心籌畫應作何積貯該撫詳
議具奏其被災各地方明歲錢糧仍照例催科小民必
致苦累著俟該撫察報分數到日將康熙三十一年春
夏二季應徵錢糧緩至秋季徵收用稱朕體恤民生休
息愛養至意尔部即遵諭行特諭康熙三十年九月十

八日

諭戶部

朕孜孜圖治軫切民依閭閻耕穫時勤諮訪其有以荒歉上聞者或蠲或賑旋即施行務令得所念河南一省連歲秋成未獲豐稔非沛特恩蠲恤恐致生計艱難康熙三十一年錢糧著通行蠲免並漕糧亦著停徵至山西陝西被災州縣錢糧除照分數蠲免外其康熙三十一年春夏二季應徵錢糧俱著緩至秋季徵收用稱眷愛黎元撫綏休養至意尔部卽遵諭行特諭康熙三十

年九月十九日

諭內閣

各省副將及以左都督授世職之叅將并先經引見者
徵取五人來京或一人至或二人至卽奏聞召見五人
畢復徵取五人如前奏聞召見特諭康熙三十年九月
二十九日

諭內閣

傳諭太常寺少卿沙拜向來廣東廣西鹽課雖屬地方

官管理而豪強之徒輒行占據不輸國課貿販私鹽因循陋習隱匿侵欺以致病商病民今特遴選爾沙拜遣往稽察兩廣鹽政職任初設彼地商人多屬京師豪貴之家鹽課弊端朕知之甚悉非令汝將前此之弊必究發而叅劾之也爾蒞任後矢勤矢慎將積弊盡除商民咸利以裕國課而濟軍餉則爾之榮不必言矣爾素悉朕意若受人請託瞻徇情面不行革除積弊則欲保首領亦不可得也朕意兩廣一歲鹽課可充一歲軍餉汝

之休咎咸在此行勉之慎之特諭康熙三十年十月初二日

諭內閣

聞畿輔穀價翔貴遣戶部筆帖式一員往諭直隸巡撫令其於所屬地方以蒸酒糜米穀者其加意嚴禁之康熙三十年十月二十六日

諭內閣

朕以生癘之故冬至未詣

天壇行禮各官上表稱賀其停止之康熙三十年十月二十八日

諭吏部

從來致治之道在正人心人心偏私則詐偽日生而習俗滋敝人心公直則囂競自息而庶績允釐朕蚤夜孜孜崇尚德教蠲滌煩苛期與中外臣民共適於寬大和平之治凡大小諸臣素經拔擢咸思恩禮下逮曲全始終卽或因事放歸或罹咎罷斥仍令各安田里樂業遂

生惟尔諸臣亦宜奉職恪共絕偏私而襄國事乃近見
内外各官間有彼此傾軋伐異黨同私怨交尋牽連報
復或已所銜恨而反囑人代糾陰為主使或意所欲言
而不直指其事巧陷術中雖業已解職投閒仍復吹求
不止株累逮於子弟顛覆及於身家甚且市井奸民亦
得借端凌侮蔑紀傷化不可勝言凡若所行雖跡甚詭
秘朕總覽幾務已三十年此等情態知之最悉儻因仍
陋習益致蔓延殊非朝廷所以體恤臣工保全愛惜之

意夫讒譖媚嫉之害歷代皆有而明末為甚公家之事
置若罔聞而分樹黨援飛誣排陷迄無虛日以致釀禍
既久上延國家朕歷觀前史於此等甘公誤國之人深
切痛恨自今以往內外大小諸臣應仰體朕懷各端心
術盡蠲私忿共矢公忠豈獨國事有裨即爾諸臣亦獲
身名俱泰儻仍執迷不悟復踵前非朕將窮極根株悉
坐以交結朋黨之罪爾部可即傳示中外使咸知朕意
特諭康熙三十年十一月初九日

諭內閣

黑龍江軍士及船戶人役以每歲耕稼穀尚不支奏請
若以此為例每歲給發而所貯之穀有限遇需用米石
時必致匱乏遣戶部賢能司官一員會同黑龍江將軍
副都統應作何核減給與詳議奏聞康熙三十年十一
月十三日

諭戶部

朕前聞陝西西安鳳翔等處年歲不登民艱粒食特命

學士布喀星馳前往察勘賑濟頃來回奏稱西安府屬咸寧等州縣衛鳳翔府屬鄠縣等三縣米價騰貴百姓流移朕心深切軫念若不大沛恩施無以徧甦疾苦這被災各地方康熙三十一年額徵銀米著通行蠲免又聞甘肅巡撫所屬地方秋收豐稔米價較平著該督撫會同詳議作何購買轉輸速行賑濟務俾比屋得霑實惠不致仳離失所以副朕撫恤災黎至意尔部卽遵諭行特諭康熙三十年十一月十四日

諭禮部

自昔帝王敬天勤政凡遇垂象示儆必實修人事以答
天戒頃欽天監奏推算日食當在康熙三十一年正月
朔日夫日食為天象之變且又見於歲首朕兢惕靡寧
力圖修省惟大小諸臣務精白乃心各盡職業以稱朕
欽承昭格至意其元旦行禮筵宴著停止尔部卽遵諭
行特諭康熙三十年十一月二十四日

諭大學士伊桑阿阿蘭泰學士滿丕圖納哈思格

則德珠王國昌理藩院尚書額爾赫圖署侍郎
事學士達瑚

逃遁來降之喀爾喀杜楞言我原在巴圖爾厄爾克濟
濃之弟博郎處博郎爲大兵所敗步行逃脫於伊巴賴
地方遇巴圖爾厄爾克濟濃所屬奇七納台吉等博郎
得馬匹糗糧往尋其兄而去巴圖爾厄爾克濟濃所食
既盡困窮已極其內互相劫奪現在厄郎奈地方巴圖
爾厄爾克濟濃所屬台吉奇七納等未得追隨而去在

厄爾得木卽舒呼地方厄卽奈距嘉峪關有四日之程
等語西安之兵現戍寧夏著侍衛阿南達偕杜楞往至
寧夏與將軍馬喇提督孫思克及總兵官等會同詳議
偵探實信巴圖爾厄爾克濟濃所在果與嘉峪關相近
可以撲滅則酌量挑選滿洲綠旗兵遣往乘巴圖爾厄
爾克濟濃之窮困而剿滅之或可相機招撫二郎保克
西現在彼處卽可遣往爾等與議政大臣會議奏聞康
熙三十年十二月初二日

諭戶部

朕撫馭區宇三十年以來早夜圖維惟以愛育蒼生俾
咸臻安阜為念比歲各省額徵錢糧業已次第蠲豁其
歲運漕米向來未經議免朕時切軫懷所有京通各倉
米穀撙節支給數載於茲今觀歷年儲積之粟恰足供
用應將起運漕糧逐省蠲免以紓民力除河南省明歲
漕糧已頒諭免徵外湖廣江西浙江江蘇安徽山東應
輸漕米著自康熙三十一年始以次各蠲免一年至江

寧京口杭州荊州大兵駐防地方亦應預行積貯著將
康熙三十一年起運三十年漕米各截留十萬石存貯
倉廩令該地方官敬慎守視以備需用爾部卽遵諭行
特諭康熙三十年十二月初四日

諭戶部

塞外聚穀甚屬要務故耕稼土田以廣積貯爲至切也
達爾湖之地其田以內府莊屯之人耕之可令總管內
務府於各莊屯內遣其丁壯其穀種耒耜及諸田器耕

牛皆令豫備於三旗內府官員新滿洲護軍披甲之中
熟諳農事者擇而遣之呼爾湖之地其田以八旗諸王
莊屯之丁壯耕之其穀種耒耜及諸田器耕牛咸令豫
備熟諳農事人員擇而遣之墾闢耕種之時稷與大麥
油麥春麥四種穀皆可藝植稷宜多種之春麥宜少種
之遣往耕田之人田既耕種畢則酌留耘田之人其餘
人遣還穀既熟則所留耘田之人可以收穫此農人所
食之米於古北口所貯米石中計口而授之西拉木倫

之地其耕田悉照原議遣盛京人役前往俟農畢秋成
之後視豐收地方其治田人員該部議叙爾等其議以
聞康熙三十年十二月初七日

諭內閣

達爾湖呼爾湖西拉木倫地方耕田所需之牛著停其
捐助於每處遣戶部司官一員帶庫銀照數購買以給
與之康熙三十年十二月十二日

諭兵部

武職官員任寄封疆關係甚重必得其人始有裨益朕
所簡閱素悉之員俱已次第拔擢今宜選材以備任用
爾部行文各將軍總督提督巡撫及無提督省分總兵
官於武職官員內副將以下千把總以上有灼見人材
勇健諳練軍務整飭營伍愛惜士卒及行間効力曾經
立功者不論本省別省見任候補限文到三日內各舉
所知保奏不必彼此會同其在內八旗漢軍官員有人
才素優嫻於約束堪任要地者亦著各都統副都統保

奏尔部卽遵諭行特諭康熙三十年十二月十二日

聖祖仁皇帝御製文第二集卷十

欽定四庫全書

聖祖仁皇帝御製文第二集卷十一目錄

勅諭

諭大學士伊桑阿阿蘭泰

諭大學士伊桑阿阿蘭泰王熙張玉書學士王

國昌滿丕圖納哈王尹方王揆李枏

諭修明史諸臣

諭戶部

諭大學士伊桑阿阿蘭泰

諭內閣

諭大學士伊桑阿阿蘭泰王熙張王書學士德
珠溫保王國昌王尹方王揆李枏

諭兵部

諭大學士伊桑阿阿蘭泰學士德珠溫保王國
昌

諭大學士伊桑阿阿蘭泰張王書學士傅繼祖

溫保王國昌王尹方王揆李柟

諭大學士伊桑阿阿蘭泰張玉書學士傅繼祖

溫保王國昌王尹方王揆李柟

諭大學士伊桑阿阿蘭泰張玉書尚書馬奇侍

郎凱音布學士傅繼祖溫保王國昌王尹方

王揆李柟

諭大學士伊桑阿阿蘭泰張玉書學士傅繼祖

溫保王國昌王尹方王揆李柟

諭大學士伊桑阿阿蘭泰

諭大學士伊桑阿阿蘭泰學士傅繼祖達瑚溫

保王國昌戴通

諭大學士伊桑阿阿蘭泰侍郎朱都納學士傅

繼祖達瑚溫保戴通王國昌

諭尚書庫勒納等

諭大學士伊桑阿阿蘭泰學士傅繼祖戴通王

國昌

諭大學士伊桑阿阿蘭泰學士傅繼祖席喇達
瑚戴通

諭大學士伊桑阿阿蘭泰學士席喇達瑚戴通
諭大學士伊桑阿阿蘭泰學士席喇傅繼祖達

瑚德珠戴通

諭戶部

諭刑部

諭吏部都察院

諭大學士伊桑阿阿蘭泰學士席喇傳繼祖德

珠戴通安布祿

諭大學士伊桑阿學士席喇傳繼祖德珠溫保

戴通安布祿

諭大學士伊桑阿學士席喇傳繼祖德珠溫保

戴通安布祿

欽定四庫全書

聖祖仁皇帝御製文二集卷十一

勅諭

諭大學士伊桑阿阿蘭泰

去歲陝西西安等處年穀不收固有積貯以致閭閻困苦至極已遣使賑濟之矣直隸所轄地方素有儲蓄或州縣稍有不登卽以所儲米穀從均贍給是以民生獲濟良多今年豐歉尚未可知陝西省府州縣現存米穀

之數應行察明先時預備至各省府州縣皆令積貯米穀數千石則裨益黎庶者大矣可下各該督撫等令各府州縣積貯米穀其所積穀數當逐一膳冊詳報戶部著九卿詹事科道等會議以聞康熙三十一年正月初二日

諭大學士伊桑阿阿蘭泰王熙張玉書學士王國昌滿丕圖納哈王尹方王揆李枏

前者纂修明史諸臣所撰本紀列傳曾以數卷進呈朕

詳晰披閱并命熊賜履校讐熊賜履寫簽呈奏於洪武
永樂本紀訾議甚多朕思洪武係開基之主功德隆盛
宣德乃守成賢辟雖運會不同事蹟攸殊然皆勵精顯
於一時謨烈垂諸奕世為君事業各克殫盡朕亦一代
之主也銳意圖治朝夕罔懈綜理萬幾孳孳懋勉期登
邛隆若將前代賢君搜求其間隙議論其是非朕不惟
本無此德本無此才亦實無此意也朕自反厥躬於古
之聖君既不能逮何敢輕議前代之令主耶若表揚洪

武宣德著為論贊朕尚可指示詞臣撰文稱美儻深求
刻論非朕意所忍為也至開創時佐運文武諸臣各著
勲績列傳之中若撰文臣事述優於武臣則議論失平
難為信史纂修史書雖史臣職也適際朕時撰成明史
苟稍有未協咎歸於朕矣明代實錄及紀載事蹟諸書
皆當蒐羅臧棄異日明史告成之後新史與舊書俾得
並觀以備天下後世之公論焉前曾以此指面諭徐元
文爾等當知之康熙三十一年正月二十七日

諭修明史諸臣

朕自冲齡卽在宮中披覽經史明實錄曾閱數過見其
間立言過當紀載失實者甚多纂修明史宜加詳酌如
弘治中太后思念崇王欲令入朝此亦情理之至常且
所封之地初不甚遠而一時大臣及科道官員交章爭
執以為不可至云人民騷擾國勢動搖時已有旨召崇
王矣竟因人言而止夫書言以親九族九族既睦若藩
王就封必不可召見則自古帝王所云睦族之道謂何

又正德實錄載午朝罷後於御道得匿名文簿一卷傳
旨詰問百官皆跪於丹墀時仆而暴死者數人暍而病
者尤衆夫夏月雖天時炎熱何至人多暴卒且行間將
士每披堅執銳戮力於烈日之中未聞因暑而致死豈
朝堂之上病暍若斯之甚耶所云盡信書不如無書此
之謂矣至於宦官爲害歷代有之明如王振劉瑾魏忠
賢輩負罪尤甚崇禎時誅鋤閹黨極為善政但謂明之
亡亡於太監則朕殊不以為然明末朋黨紛爭在廷諸

臣置封疆社稷於度外惟以門戶勝負為念不待智者
知其必亡乃以國祚之顛覆盡諉罪於太監謂由中官
用事之故烏得為篤論耶朕宮中所用太監止令供灑
掃奔走之役一嚙一笑從不假借所以數十年以來太
監皆極貧乏有不能自給者爾諸臣想亦悉知朕非信
用太監之主惟朕可為此言作史之道務在秉公持平
不應膠執私見為一偏之論今特與諸臣言之宜共知
此意康熙三十一年正月二十九日

諭戶部

朕勤求治理念切民依凡有往來人等必以年歲之豐歉雨澤之有無一切閭閻情形備悉諮訪前聞陝西西安鳳翔各屬饑荒已經特頒諭旨蠲免錢糧並發帑金專遣大臣賑濟仍撥給別省錢糧刻期運送務使均霑實惠人獲更生近又聞頒賑之前尚有貧民散入四方流離失業勢不能復還鄉井儻不曲加撫綏必致轉於溝壑深為可憫凡流民所至地方應令該省督撫董率

有司區畫賑濟令各得所其賑濟過人口數目著具冊
題報有能酌量資給俾回原籍者一併造冊具奏至於
湖廣襄陽等處距潼關相近且道路平坦易於轉輸襄
陽等處所有積貯米穀應令該督撫運至潼關陝西督
撫接受轉運庶於散給兵餉賑濟饑民均有裨益應作
何輓運尔部作速詳議具奏特諭康熙三十一年二月
初四日

諭大學士伊桑阿阿蘭泰

陝西省西安鳳翔兩府所屬地方去歲遇災雖曾自京師頒發帑金遣官賑濟然百姓仍有流移者此皆無積貯預備之故也今靳輔已簡任河道總督矣靳輔於河道情形熟練曉暢可截今年漕米二十萬石交與靳輔作何酌量僱船由黃河輓運抵山西蒲州等處預為積貯即偶遇災傷既有所備於軍儲民生咸獲裨益矣至由黃河逆流轉運勢屬艱險若有米船損壞之事免其議罪則靳輔亦得殫心盡力黽勉報稱可降旨九卿會

議尔等亦同靳輔議之康熙三十一年二月初四日

諭內閣

江北漕米速行截留二十萬石至蒲州等處積貯預備
誠為有益但自砥柱至蒲州一帶地方可否輓運若遣
部中司官往視或勘閱草率借端推諉稱為不可若交
與地方官則退縮畏事託辭勞民或以彼地豐收無處
需米指稱不必輓運或因循遲緩以致冰凍指稱不可
輸輓如此則特命運米亦屬徒然矣凡事身任其責殫

心奉公竭蹶圖之無有不奏效者前黑龍江置戍轉運軍儲衆皆謂地屬初闢其事為難朕惟斷自一己見諸施行今屯兵列陣運道開通絕塞遐邊丕振功效此卽已著之實驗也可下九卿議之康熙三十一年三月初四日

諭大學士伊桑阿阿蘭泰王熙張玉書學士德珠
溫保王國昌王尹方王揆李枏

總河靳輔年邁而有疾河務所關至要當豫遣材幹之

人用副靳輔俾習練河務則異日可以接續綜理其下
九卿議奏康熙三十一年三月十六日

諭兵部

國家簡用武臣委任封疆重寄專期軍民輯睦邊境又
安其實有宣力累年茂樹偉伐者則旌庸之典必加渥
焉甘肅提督孫思克久歷邊地熟諳機宜當秦省用兵
之時素著勞績自任提督以來益殫謀猷實心幹濟惠
愛洽於士卒威望聳乎外彝特沛殊恩用昭寵獎著加

太子少保給一拜他喇布勒哈番以示朕展勲酬勞至
意尔部卽遵諭行特諭康熙三十一年三月十七日

諭大學士伊桑阿阿蘭泰學士德珠溫保王國昌
近觀科道等官竟無條奏者夫設立科道特欲其有所
建白也當言之時應不時具奏可以此意傳與科道官
知之康熙三十一年三月二十九日

諭大學士伊桑阿阿蘭泰張玉書學士傅繼祖溫

保王國昌王尹方王揆李枏

喀爾喀王貝勒貝子公台吉等向未入覲京師初次來
朝者仍依原賞喀爾喀之例給之若曾經入覲一次已
蒙錫予而復來者皆準四十九旗例以頒賚焉其下理
藩院註冊著為定例遵行可耳康熙三十一年四月十
九日

諭大學士伊桑阿阿蘭泰張玉書學士傅繼祖溫
保王國昌王尹方王揆李枏

遣往察看黃河之前鋒統領碩鼐等差回奏稱察看黃

河自寧夏至潼關皆可舟運但龍王站一處水勢陡絕湍激不可行船其間由陸路起剝十里過水陡之處卽由船運便可直至潼關西安矣旣如此應差工部賢能司官一員會同巡撫葉穆濟於船窩裏地方造可載一百石之船二百隻逆流至龍王站下停泊預為備用又聞歸化城北翁魁等山產有材木令遣八旗鐵匠木匠歸化城派出夫役伐木踞板運至湖灘河朔津口造裝載一百石之船二百隻此造船所需鐵與油麻等物自

該部發往船工既畢之後將大同米石出沙虎口轉運至湖灘河朔津渡泊船之處俟彼時再議造船之暇自大同至湖灘河朔工所其轉運之路應察看詳明預加料理爾等會同戶工二部確議以聞康熙三十一年五月初一日

諭大學士伊桑阿阿蘭泰張玉書尚書馬奇侍郎
凱音布學士傳繼祖溫保王國昌王尹方王揆
李杲

聞山西平陽府等處雨水協時年麥豐收其直必賤可
遣賢能官員往彼購買預為積貯不惟有益於民異日
儻有需用亦得所資矣可令九卿詹事科道會議以聞
康熙三十一年五月初一日

諭大學士伊桑阿阿蘭泰張玉書學士傳繼祖溫
保王國昌王尹方王掞李枏

積穀者至要之務也誠有所積貯雖遇災傷斷不致於
饑饉但小民不知儲蓄每值豐收之年恣意糜費及逢

儉歲遂底困窮今時屆麥秋可勅各該地方官勸諭百姓比戶量力共相樂輸委積儲峙州縣官將捐助者姓名與米數註冊秋成之後亦倣此行焉其春時乏食者貸與之至秋照數收入以為積蓄夫每年於麥穀告登之候勸勉捐輸則數歲之間倉廩充裕卽罹災祲民食自可不虞匱乏矣尔等會同九卿詹事科道議奏康熙三十一年五月初二日

諭大學士伊桑阿阿蘭泰

今年陝西西安地方三春雨水愆期秋收豐歉未可預計襄陽者附近西安形勝之地也可將截畱江寧荊州糧各十萬石交與該督撫以官船運至襄陽先時儲蓄其下九卿詹事科道卽行會議以聞康熙三十一年五月初九日

諭大學士伊桑阿阿蘭泰學士傅繼祖達瑚溫保
王國昌戴通

西安巡撫布哈疏稱雨水未足人民患病者頗多夫雨

水不足則秋收難望若何拯濟其疾病若何救治可下
九卿科道會議以聞康熙三十一年五月二十四日

諭大學士伊桑阿阿蘭泰侍郎朱都納學士傅繼
祖達瑚溫保戴通王國昌

朕思此時正當簡閱軍旅以備調遣每佐領撥烏鎗護
軍各一人撥前鋒親軍護軍各十人漢軍火器營兵撥
二十人如無須調遣朕巡歷塞外時親率以往此兵各
給整理器械銀十兩使今冬竟不徵發則所給銀兩可

於軍餉之內寬緩其期零星除扣之其下旨議政大臣
各都統將所派禁旅器械軍裝皆令全具無缺以備一
有調遣立可啓行大臣官弁併擬出焉此師不過預備
而已可將是意諭軍士知之康熙三十一年五月二十
八日

諭尚書庫勒納等

審事畢爾等親齎來奏知府副將在邊疆啓隙生事以
未叛指為已叛擅興師旅詭報擊敗者事關軍機卽行

加戮何必遲疑尔等會同總督審明卽於彼地正法示
衆否則遐邊遠域啓隙誑報者安所懲戒耶至於土司
尔等如再三招徠安輯彼仍抗拒不出會同總督撲剿
之可將此旨繕寫呈覽交大學士等特諭康熙三十一年
七月初八日

諭大學士伊桑阿阿蘭泰學士傳繼祖戴通王國

昌

將軍薩布蘇奏請達呼里西白之五百兵令其學習烏

鎗夫以邊兵訓練火器所言雖是但達呼里西白之衆
遷徙甫至未獲寧居盡其族類槩令學習似為未當或
俟之數年安土樂業始令操練鳥鎗或應作何籌度另
為訓練其密咨薩布蘇具議以覆康熙三十一年七月
十五日

諭大學士伊桑阿阿蘭泰學士傅繼祖席喇達瑚

戴通

聞西安所屬驛站凋敝可交該督撫整頓之彼土民生

近日情形比前如何田禾收穫豐歉如何秋麥已播種
乎抑猶未也可令詳明踏看來奏康熙三十一年九月
十四日

諭大學士伊桑阿阿蘭泰學士席喇達瑚戴通

今所備禁旅之內每佐領撥護軍七名其前鋒軍則簡
四百名火器營兵則分其半於十月杪遣赴大同飼養
馬匹預備徵調應遣大臣令兵部奏請曾隨朕之每佐
領護軍一人可除出之至京師簡軍預備其事宜亦令

具議以聞康熙三十一年九月十五日

諭大學士伊桑阿阿蘭泰學士席喇傳繼祖達瑚

德珠戴通

筆帖式季慶鶴力保盜賊情殊可惡其革職發往黑龍
江效力可改簽批發前者工部筆帖式愛新阿監造新
滿洲房屋曾有梁木摧折致新滿洲被壓而斃聞其為
人不孝不義至於已極八旗之衆無弗知者乃工部堂
官不行題叅褫革反委為司員令監工作夫筆帖式者

漸次陞擢可為司員可為大臣者也如此不孝不義之人豈可為大臣與司員哉其嚴飭各部院有似此孝義不修行止謬亂好生事端代寫詞狀者察出革其筆帖式儻被革者異日挾仇訐告朕決不聽理也可咸傳諭之康熙三十一年十月初二日

諭戶部

陝西西安等處地方連歲凶荒繼以疾疫因而閭閻失業游致流移朕軫恤民艱焦勞宵旰自去歲冬月以來

頒發帑金蠲免正賦輓輸積穀轉運漕糧屢次特遣大臣察勘多方賑濟念國家所重惟在養民目今秦省雖薄有秋收但民間匱乏已極儻非格外加恩無以使積困盡甦轉徙盡復陝西巡撫所屬府州縣衛所康熙三十二年地丁銀米著通行免徵從前所有積欠未完錢糧亦著通行蠲豁務俾比屋同霑實惠小民咸慶更生用稱朕子愛元元撫育安全至意爾部卽遵諭行特諭

康熙三十一年十月初六日

諭刑部

朕保乂黎元崇尚寬大每於刑獄之事輒厯矜恤之懷
秦省西安等處地方比歲薦饑閭閻困苦業已多方賑
卹屢諭蠲租尤宜大沛仁恩特加赦宥凡陝西巡撫所
屬今年秋審情真緩決人犯內除十惡及軍機獲罪官
員犯罪不赦外其餘自諭旨到日通省免死照例減等
發落有見在審擬未經結案者亦如之嗣後務令革心
嚮善副朕法外生全至意尔部卽遵諭行特諭康熙三

十一年十月十二日

諭吏部都察院

國家設立言官職司耳目一切吏治民生得失利弊皆
宜殫思畢慮據實直陳近見滿漢科道官員建白甚少
殊非朕責望言路之意嗣後應各矢公忠研求時務凡
可以裨益國家之事悉據所見奏聞以俟採擇但不得
懷挾私情紛更定例勒襲陳言浮泛塞責其有真知灼
見應糾劾者卽行叅奏亦不得暗受囑託代人報復苛

責細事希圖傾陷尔部卽傳諭遵行特諭康熙三十一年十月二十三日

諭大學士伊桑阿阿蘭泰學士席喇傳繼祖德珠
戴通安布祿

將軍薩布蘇佟寶等奏請驛站缺丁依數頂補無妻室者給以婦人驛遞再為增置壯丁馬畜錢糧俱行添設則驛站可不致因敝朕思驛站因敝者皆該將軍等不省徭役不簡事件絕非要務槩令馳驛勒索之所致也

雖添置驛丁增給錢糧事若不務簡省究復何益且所需婦人為數多矣取給一時將焉可得伊等在彼其可得緣由或有成算耶可勅該將軍薩布蘇佟實等如何減省徭役不致凋敝驛遞所缺男婦從何充補會同盛京將軍確議報部康熙三十一年十二月二十一日

諭大學士伊桑阿學士席喇傳繼祖德珠溫保戴

通安布祿

大同右衛屯駐大兵有事則大同總兵官必協同征行

其鎮標兵及沙虎口協標兵皆當改為騎卒可下兵部
議奏康熙三十一年十二月二十八日

諭大學士伊桑阿學士席喇傳繼祖德珠溫保戴
通安布祿

聞西安米價尚復翔貴流民還籍者少朕為陝西地方
民生時存諸懷必如何措施然後於民有濟蓋孳孳不
置也先是聞自湖廣之襄陽抵陝西商州水路可達已
遣郎中蘇赫納閱視今問之內大臣索額圖乃亦乘船

自商州行至襄陽夫西安米價如尚翔貴則流民不能復歸本籍自商州至襄陽既有水路可將現運至襄陽之米二十萬石卽自襄陽水路轉輸至商州更自商州轉輸至西安俾相販糶則陝民之饑者流者均得蘇息矣可特遣京師賢能大臣一員會同總督丁思孔總兵官王化行等率道員劉暄將轉運米石及招還流民之事委之專理其自襄陽運至西安之米以湖廣價直止加算所運腳費與之貿易則米價必賤於民生大有裨

益而流移之衆亦獲速還故土所得米直齋至湖廣復
買米糧亦依此法轉輸平糶當俟陝西流民悉還本籍
米價既賤之後方行停止尔等會同速議以聞康熙三
十一年十二月二十八日

聖祖仁皇帝御製文二集卷十一

欽定四庫全書

聖祖仁皇帝御製文第二集卷十二目錄

勅諭

諭大學士伊桑阿阿蘭泰學士席喇傳繼祖溫
保戴通安布祿

諭內閣

諭內閣

諭內閣

諭內閣

諭內閣

諭大學士伊桑阿阿蘭泰尚書馬奇顧八代索

諾和圖納薩木哈班第都御史沙海侍郎溫

達滿丕學士席喇傳繼祖安布祿

諭內閣

諭大學士伊桑阿阿蘭泰王熙張王書李天馥

學士席喇傳繼祖溫保戴通安布祿王尹方

李柟李應鴈

諭領侍衛內大臣卽談等

諭內閣

諭內閣

諭內閣

諭領侍衛內大臣伯費揚古

諭內閣

諭內閣

諭戶部

諭內閣

諭內閣

諭內閣

諭戶部

諭戶部

諭大學士伊桑阿阿蘭泰學士傅繼祖溫保德

珠戴通沈圖常書

諭兵部

欽定四庫全書

聖祖仁皇帝御製文二集卷十二

勅諭

諭大學士伊桑阿阿蘭泰學士席喇傳繼祖溫保
戴通安布祿

聞厄魯特噶爾丹無所得食困迫已極仰食於其所屬
番人而有來哈密之信哈密於我邊塞相去最近可發
寧夏駐防滿兵令往甘肅提督孫思克處為之預備孫

思克所轄官兵亦當令其整頓豫備此外本省附近地方官兵有宜調發預備者令孫思克一面調發一面奏聞又貝子察汗巴爾之弟班第自瑚瑚腦兒來時由西喇塔喇於邊內行來遇伊拉固克三胡圖克圖亦由邊內行往如此潛行來往邊塞官員何以不復稽察耶此亦當檄孫思克邊塞官員令其嚴加戒飭汝等會同兵部密議以聞康熙三十二年正月初二日

諭內閣

日者盛京招民有議叙之例今西安等處流民尚有未
歸本業者茲西安等處流民招復幾戶復歸本業助給
牛種等物令之耕種收穫一季者其宜議叙吏戶二部
察例以聞康熙三十二年二月初一日

諭內閣

西安米價尚爾翔貴戶部可招募身家殷實各省富商
給以正項錢糧並照驗文據聽其於各省地方購買糧
米運至西安發糶所得利息聽商人自取之如此往來

運販待西安米價得平之時但收所給原銀大有裨益也其具議以聞康熙三十二年二月初一日

諭內閣

騎射乃我國家振興要務朕深悉其由於三旗內府佐領中幼稚特命官教之皆各嫻習騎射由是以觀騎射之優劣繫於教與不教耳凡茲稚子不自幼時教習則騎射之事漸至衰替今於八旗官學生及佐領中間散稚子亦當專官教習之汝等會同八旗都統議以聞康

熙三十二年二月初五日

諭內閣

廣東省鹽丁鹽課自康熙二十二年於原額外加銀一萬四千二百四十六兩此所加銀今歲可免其半康熙三十二年二月初八日

諭內閣

宗族之始皆一祖所生當極致親睦共相愛卹扶持以為生也今見諸王以下互相讒害樂禍幸災略無親睦

之誼凡若此者朕知而不言誰復言者吾宗室中如此於我人民得無愧乎以親九族九族既睦書有之矣且或者同為宗室以他祖父之名名其子若孫者有之今吾宗室之中不定為親睦以相愛卹扶持之道長此安窮無所底止朕意此後八分公以上諸吉凶事會集之禮依向所定者行之如未入八分公以下至於閑散宗室其吉凶之事亦宜定會集儀式此皆令八旗會集則不勝其繁矣其令本翼會集焉喪事則一旗之中為

之服別旗惟去其纓又閑散宗室中有極貧者一有吉凶之事則稱貸而為之致有窘迫者凡若此類諸王以下閑散宗室以上各以其意出助銀一兩或數星出者既不以為難而得之者良有所益庶不至苦於債負矣其會集自其身之品級以下者而會集之閑散宗室無品級者則視其父之品級會集凡會集不至者有司者察叅如此則皆相識而親不惟是也有為不善者遇之亦可教以正若貧宗室亦不困於為生此欲我宗室和

協優游以安處之意也天宗室中今名有犯者宗人府
悉察改焉自茲以往歲所送名亦卽詳察其有犯者駁
之令改焉朕此旨汝等同滿洲尚書侍郎宣示諸王及
閑散宗室令其會同定議以聞康熙三十二年二月初
十日

諭大學士伊桑阿阿蘭泰尚書馬奇顧八代索諾
和圖納薩穆哈班第都御史沙海侍郎溫達滿
丕學士席喇傳繼祖安布祿

聞噶爾丹艱於食窮困已極來就食於哈密哈密近在
塞下若不豫為設備乘隙事生其時不及防矣今雖於
甘肅令滿洲綠旗兵預備而兵力尚單可自京師每佐
領出兵二人由邊外往寧夏就提督孫思克處預備陝
西總督標下火器營兵出二千人馬兵出千人亦遣往
孫思克處令其預備汝等可同議政大臣領侍衛內大
臣索額圖即談副都統阿南達議以聞康熙三十二年
二月十四日

諭內閣

往年山東旱遣故尚書蘇赫禱於泰山今歲陝西郡縣
雨澤雖布而往者數惟旱災矣夫華山關中名山也宜
遣大臣祀之卿等同禮部諸臣議以聞康熙三十二年
二月十五日

諭大學士伊桑阿阿蘭泰王熙張玉書李天馥學
士席喇傳繼祖溫保戴通安布祿王尹方李枏
李應鴈

衛既齊本降級調用一州判耳以其素有虛名特復其原官以檢討又超擢為布政使未幾內陞府尹累加遷擢至副都御史遂又授為貴州巡撫受國家恩可謂至矣為府尹時其條奏疏中自詡比之名伯君陳假若其所行者一二符其所言猶有可恕者乃初至貴州遂私動兵革妄生邊事殺無罪苗民詐報軍功種種欺誑凡此惡行雖常人所不為而彼以古人自況反不知忌憚而為之蓋於彼所言者略不相顧而大負國家之恩矣

彼平昔但務虛名妄稱道學委之以事毫無實濟若此欺罔世人沽取虛名之輩不得不重加懲創為欺世盜名者之戒汝等同九卿於午門外召既齊問之康熙三十二年二月二十七日

諭領侍衛內大臣郎談等

近聞厄魯特噶爾丹得食甚艱有來哈密地方覓食之信哈密逼近甘肅邊界若不預為之防恐彼乘隙生事一時不及設備致失機宜故遣發禁旅特命爾領侍衛

內大臣郎談為昭武將軍前往爾統領大軍赴孫思克處駐劄防備一切事務爾同西安將軍博濟振武將軍提督孫思克商酌而行簡閱兵馬餵養肥壯整搦器械務嚴束官兵不得騷擾百姓其一應錢糧聽有司各官應付地方事情不得干預至於官兵俱有部頒紀律如有違犯爾等會同商酌照依定例處分不得姑息以致紀律懈弛爾等須會商不時遣人遠探消息儻噶爾丹有犯邊情形爾等有出口應行機宜一面奏聞一面施

行母失事機爾等其慎之故諭康熙三十二年三月二十一日

諭內閣

山陵掌印郎中古塞邁圖桑額員外郎阿布喇彼皆効力於

山陵年且久矣竟不得遷良可憫也可兼太常寺卿銜視其兼銜給之俸汝等議以聞康熙三十二年三月二十六日

諭內閣

見各省解送物料其中亦有無用者亦有此間購買價輕而可得者其下戶部詳議其當解不當解者具以聞將以紓吾民焉康熙三十二年三月二十六日

諭內閣

聞自黃河逆流而上船運粟至朱仙鎮自朱仙鎮陸輓數里達於黃河以小船載運可抵潼關若此輓運可歟否歟又不涉黃流而他河有可輸運者歟抑果無歟其

勅于成龍令擇才敏者往審視之悉以達內閣卿等以聞康熙三十二年四月初六日

諭領侍衛內大臣伯費揚古

茲以歸化城乃邊外各部落扎薩克總要之地凡西北蒙古地方有事皆可預為防禦現在雖有土墨忒兩旗官員兵丁但隊伍紀律素不嚴整今又增蒙古兵甚多不可不特設將軍管理總率兩旗都統副都統訓練新舊官兵整理器械法制初定關係甚重茲命爾領侍衛

內大臣伯費揚古前往管理安北將軍事務俟一年更換爾駐劄歸化城統轄兩旗官兵及新增兵丁務須申明紀律謹練士卒整飭隊伍修備器械革除積弊勸課耕種廣儲糧糗不時偵探各處消息一切事宜與兩旗都統副都統計議而行凡有軍機事務卽時奏請候旨施行爾受茲委任須殫心竭力宣布德威操練官兵一如禁旅斯克稱委任爾其慎之故諭康熙三十二年六月十五日

諭內閣

聞陝西雨水最多山東雨水亦多此兩省雨多則黃河之水必大惟此之故朕時繫於懷殷殷慮之可遣戶部員外郎伊巴里再擇司官一人往見于成龍詳問水勢及堤岸情形來奏康熙三十二年六月二十一日

諭內閣

朕於各省往來者及請安而至者必問其地方情形雨澤應時與否頃自江南浙江來者問之云江浙間今年

甚旱戶部其擇司官二員一遣往江南一遣往浙江詳
詢江南總督浙江巡撫雨水情形來奏康熙三十二年
六月二十八日

諭戶部

朕撫御寰宇早夜孜孜惟以實惠及民俾登康阜為念
廣西四川貴州雲南四省俱屬邊地土壤磽瘠民生艱
苦與腹內舟車輻輳得以廣資生計者不同朕時切軫
懷厯歲以來屢施恩卹廣西省康熙十六年通省錢糧

十七年十八年民欠錢糧貴州省二十二年秋冬及二十三年春夏地丁錢糧又貴州四川二省二十五年未完及二十六年應徵錢糧雲南省二十七年以前屯地積欠錢糧俱經次第蠲豁茲念育民之道無如寬賦矧邊省地方非再沛優恤之恩則閭閻無由充裕所有康熙三十三年四省應徵地丁銀米著通行蠲免仍行文該督撫徧加曉諭令人霑實澤以稱朕加惠遠省民生至意如有不肖有司借端朦混私自徵收者該督撫指

名奏劾從重治罪尔部即遵諭行特諭康熙三十二年八月初三日

諭內閣

江浙二省今年夏旱雖不成災秋收量必有限若漕糧照常徵收起運恐民食將至匱乏朕為此常切軫念除浙江漕糧已經改於今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益

著滿漢大學士等會同戶部堂官倉場侍郎等作速確
議具奏康熙三十二年九月十六日

諭內閣

前尚書科爾坤諳練事務在戶部時著有勤勞被叅之
事殊不明晰以其年邁不復任用可復其尚書銜又米
漢雯被叅之事亦不明晰供奉內庭勤勞有年可復其
原官特諭康熙三十二年十月初十日

諭內閣

聞山東今年田收之後九月中蝗螟叢生必已遺種於田矣而今歲雨水連綿來春少旱蝗則復生未可知也先事豫圖可不為之計歟乘時竭力盡耕其田庶幾蝗種瘞於土而糜爛不復更生矣若遺種即有未盡來歲復萌地方官即各於疆理區畫逐捕不使滋蔓其亦大有益也命戶部連牒直隸山東河南山西陝西巡撫等示所領郡縣咸令悉知田則必於今歲來春皆勉力耕耨蝗螟之災務令消滅若郡縣有不能盡耕耨其田者

蝗或更生則必力為捕滅毋使蝗災為吾民患康熙三十
二年十月初十日

諭戶部

陝西西安鳳翔二府地方連被災傷朕多方賑救轉粟
蠲租又招集流移散給牛種然後四方仳離之民漸次
復還鄉井今歲雖雨澤霑足百穀阜成而人民甫脫饑
寒未饒生計若明歲應徵錢糧卽令輸納誠恐閭閻儲
蓄終難充裕西鳳二府屬被災州縣衛所康熙三十三

年糧米照舊徵收外其地丁銀兩著通與蠲免尔部卽行文該督撫嚴勅各屬徧加曉諭務俾均霑實惠以稱朕愛養休息至意如有不肖有司濫混私征者該督撫指名劾奏從重治罪康熙三十二年十月十二日

諭戶部

朕念切民生時厯宵旰或在宮禁之中或經巡省之地務以編氓疾苦備悉諮詢其從各省來京陛見官員及往來奉使人等亦無不以該省雨澤曾否應時田畝有

無收穫竝閭閻資生情形一一體訪比年以來因國家
經費尚充遂將各省地丁額賦及舊欠錢糧節次蠲免
卽從前未經停征之漕糧亦逐年免徵總欲使海隅蒼
生培固元氣庶臻於家給人足之風今歲畿輔地方雖
禾稼未獲稔收初意小民糊口之需猶足資給未必生
計遂致艱難頃者展謁

山陵沿途察訪民隱見今歲雨水過溢田畝被淹沒者
甚多穀耗不登米價翔貴又聞順天河間保定永平四

府所屬皆然目前米價既貴將來春夏之際時值益昂
小民必艱粒食此朕目所親覩若來歲錢糧仍然徵收
朕心實有未忍順天河間保定永平四府康熙三十三年
應徵地丁銀米著通行蠲免所有歷年舊欠悉與豁
除行文該撫諭各屬務令人霑實惠以副朕子育黎
元至意尔部卽遵諭行特諭康熙三十二年十一月二
十五日

諭大學士伊桑阿阿蘭泰學士傅繼祖溫保德珠


戴通沈圖常書

行間被創及殘廢者雖已給身價之半而不食錢糧則
貧者無以為生此人皆奮力兵陣至於殘廢良可憫惻
茲後若此殘廢中尚可支持者充南苑門甲倉庫諸地
老人缺給以錢糧前為護軍校驍騎校而有可支持者
諸館之首領及其副缺用之康熙三十二年十二月十
四日

諭兵部

本朝滿州官兵從來精銳驍勇遇寇必克所向無敵前
厄魯特噶爾丹之役官兵不能悉體朕意卽行剝減致
失機會罔奏膚功朕每念及時恚於懷故比年以來簡
閱官兵歲凡兩舉朕躬臨指示訓誨頃閱武時見諸士
卒行列整齊隊伍明晰進退嫻熟嚴肅無譁所有軍令
無不遵守該管官員號令約束既嚴且善此皆官兵協
志同心各加奮勵所致朕心深為嘉悅八旗前鋒護軍
撥什庫驍騎兵等各賞給一月錢糧閒散官員照護軍

給一月錢糧火器驍騎兵亦照護軍賞給有管轄職掌
官員悉賞給內庫緞疋其賞賜緞疋戶部會同總管內
務府衙門議奏這次閱武時官員內有降級罰俸者俱
准開復以示朕體恤將士申明賞罰之至意至八旗步
軍官兵有察緝盜賊巡理道路等役甚多極為勞苦步
軍亦各賞給一月錢糧管步軍官員亦各賞給緞疋獎
勤恤勞用稱朕意尔部卽遵諭行特諭康熙三十二年
十二月二十日



聖祖仁皇帝御製文第二集卷十二